

Benny Nisbet:

Lago a pasa Gobierno un fastball

ORANJESTAD(AAN)—Durante un conferencia di prensa lider di e partido PPA, Benny Nisbet, a comenta ariba e acuerdo cu Gobierno a firma cu Exxon.

Nisbet a enfatisa cu Gabinete Eman nunca tabata y te ainda no ta suficientemente prepara pa sinta na mesa cu Lago y negocia un acuerdo na bienestar di e comunidad Aruba.

Un ehemplo cu Nisbet a menciona ta e asunto di daño ambiental. Segun Nisbet hopi hende ora nan tende encuanto daño ambiental ta bisa, pero esey ainda no a worde negocia esey ta bin despues.

Esaki segun Nisbet no ta berdad pasobra Gabinete Eman a bay di acuerdo cu lo duna un carta liber, esta un carta na unda Gobierno ta hala aden tur derecho cu Gobierno por tin (o claim) ariba Lago pa cierto terenonan cu lo worde pasa pa Gobierno por ehemplo den vecindario di powerhouse no. 1. y diferente otro facilidatnan Nisbet a remarca cu e momento cu duna un carta liber kiermen a mishi cu tur otro tereno y tur otro eventual claims cu por ta existi pa cu e terenonan involvi.

Nisbet a bisa cu na aña 1985 Gobierno di Aruba a laga haci un investigacion door di un compania Hulandes "Grondmij" pa Gobierno haya un vista di e daño ambiental/ecologico cu Lago a causa na Aruba den su 60 añanan di funcion.

E rapport aki segun Nisbet a costa Aruba 1.1 Miyon

Florin Hulandes.

E rapport a conseha pa laga haci un investigacion mas profundo encuanto e daño ambiental.

Nisbet a remarca cu nunca e investigacion a tuma lugar pues Gobierno no tin un vista kico e daño ambiental y ecologico ta.

Den e acuerdo cu Lago a firma cu Gobierno, Lago a bisa cu e kier keda cu e area y e facilidatnan di transshipment pa e waak si e por haya un compania pa explota esaki. Si Lago no logra dentro di 9 luna anto tur facilidat y e tereno lo worde pasa pa Gobierno di Aruba na unda atrobe un carta liber ta worde duna pa e terenonan ect. Nisbet a puntra di con????

Pakico Aruba mester tuma esakinan despues cu Lago no a logra cu su intento ariba un "as is where is" basis???

Si lago no a logra haya un otro compania pa explota esaki, kico ta e oportunidad real cu Gobierno di Aruba tin????

Pakico ta henter e tereno menciona mester haya un carta liber aki 9 luna??? Esaki kiermen cu si acaso cu Gobierno no logra haya un compania pa explota esaki, Gobierno y pueblo lo keda hinca cu e dismantelacion y e cleanup ambiental cual ta core den Miyones??? Aruba tin placa pa paga esaki??? Tambe Nisbet a bisa cu pa colmo de los colmos, si Lago haya un di 3 partido pa explota e transshipment y esaki no logra continua pa cualkier motibo dentro di un periodo di 2 aña anto Aruba ta haya tur e facilidatnan ariba un "as is where is"

basis, y un carta liber lo worde duna na Lago.


Nisbet a puntra, con Aruba por mara su mes pa tuma e facilidatnan aki despues cu e compania cada di prueba cu transshipment for di Aruba kizas no ta factible? Ta con Aruba lo por haya

un otro compania e ora ey? Di con Aruba mester duna un carta liber aki? Di con Aruba indirectamente ta tuma ariba dje e responsabilidad di dismantelacion si resulta cu Aruba no por haci uso di e facilidatnan e hora ey? Den ki desastre nos ta

hincando nos culpa (Gabinete Eman)? Unda Staten di Aruba ta keda den henter e asunto aki?

Nisbet a manifesta cu intencion di PPA ta pa "trek aan de bel" pa no tende mañan cu Gobierno no tabata na haltura di esaki.

Promer piedra Intelcenter



ORANJESTAD(AAN) — Ayera dia 19 di Februari 1988, Ministro di Trafico y Comunicacion Mr. A.R. Bermudez a pone oficialmente e promer piedra pa construccion di e Central Internacional di Telecomunicacion di Setar na Sero Blanco. E ceremonia a tuma lugar den presencia di miembronan di Consejo di Ministro, funcionarioman di Gobierno, representantenan di prensa y contratista.

E Intelcenter lo ser construi pa Albo Aruba N.V.

y e trabao lo ser entrega na September proximo. E gastonan total ta alrededor di Afls. 3.700.000,- pa construccion, arquitecto y gastonan pa conseho.

Ariba e promer piso lo bini central nobo internacional di telefoon digital, e satellite groundstation y e central nobo pa telex. Ariba e segundo piso lo tin espacionan pa oficina, sala di reunion y facilidatnan pa e personal administrativo.

E edificio lo ser acomoda cu sistemanan extra cu ta garantiza e con-

tinuidad di e telecomunicacion internacional di Aruba manera sistema di electricidad, aireacondicionado, sistema automatico pa combati candela y sistema di seguridad di television circuito cera.

E proyecto di central di telecomunicacion internacional ta duna un aporte grandi na mehoracion di e infraestructura di Aruba. Tambe e central aki ta duna e pais entrada directo pa e trafico internacional di telefoon, telex y television.

Avion Concord lo baha na Aruba dialuna?

ORANJESTAD (AAN)—Fuentenan bon na altura a duna DIARIO di conoce cu dialuna por ser spera un vuelo di e tipo di avion Concord aki na Aruba.

E noticia aki no por a ser confirma ya cu autoridad di Aruba no ser asearcha, pero si Esso Petroleo pa duna fuel na e nave.

No mucho aña pasa un tipo di avion asina a baha aki na Aruba cu prueba.

E vuelo cu ta ser spera dialuna ta for di New York y autoridad na aeropuerto no por a confirma a noticia aki ya cu si ta asina nan tin cu tuma cierto medida.

Ta ser spera cu tin algo mas cu 100 pasajero.